

PILIPAI

Awayauwedo

1 ¹Yau Paulo na Timoti baidagu apaipaihowa Taulivahi Yeisu
vehabana, yami leta aleleyawa omiu taumiya Pilipai Yeisu Besinana
yana Yaubada yana bодao yo hinage yami taumugaiwo na Besinana
yana taupaihowao maudoimiu alimiyyai. ²A'awanoi Tamada Yaubada na
yada Bada Yeisu Besinana yadi ve'i'ilä yo yadi nuwadaumwali imiyamiya
alimiyyai.

Paulo yana awanoi taumiya Pilipai vehabadi

³Hauga teina Yaubada ainai ya'awa yauwedo, hauganane
yanuwatuwuigomiu. ⁴Na yayaliyaya vehabamiu yagu awanoiwu aidiyai.
⁵Yo Yaubada ainai ya'awa yauwedo ama haguwo alimiyyena alobalobaidi,
wasa namwanamwana ana walomahalava abavetuwanu ainai ta wau.

⁶Yo hinage yahanapui ebeha Yaubada yana paihowa namwanamwadi
bada alimiyyai ivetuwnuniya'o ta ibom mata ive'ovi Yeisu Besinana yana
ahubena mwala'ina ainai. ⁷Yagu yaliyaya vehabamiu idumwalu wuwuna
omiu nuwagu amvaiya'o, ta omiu baidaguwao Yaubada ihaguhaguigita
teina hauga vada paipaiyai yamiyamiya, yo ihaguhaguigita hinage wasa
namwanamwana ana lo'aleha, yo yana abawahiyala aidiyai.

⁸Yaubada ihanahanapuigau neta Yeisu Besinana yana velauwena
nuwanuwagu yavelauweomiu. ⁹Na ya'awa awanoi vehabamiu ta
yami velau namwanamwa imwala'i, mayami hanapu yo nuwamasele
maudoina. ¹⁰Ta ainaena ginauli namwanamwadi amvesinuwaidi, eeta
Besinana yana ahubena ainai mata mumugamiu dumwadumwaludi yo
masemaseledi, ¹¹na yami paihowa namwanamwadi Yeisu Besinana yana
wahiyalaena vehabamiu tomowa Yaubada hiwalo vetuvehaeyei yo hi'awa
wasawasaei.

Paulo yana talam Besinana ainai

¹²Tauhiguwao, nuwanuwagu yo amhanapui ebeha vitaiwone teina
bada yalobaidi'o ta aidiyena wasa namwanamwana i'aiyauya tomowa

bagibagilidi aidiyai.¹³ Ainaena dalava teina Sisa yana tau'alehao yo tomowa maudoidi bada hibenalena'o ebeha Besinana vehabana himwamwauwigaune vada paipaiyai.¹⁴ Yo hinage tahidao bodadi yagu miya vada paipaiyai hi'itaya'o, ta hinuwamotu yada Bada yana paihowa ainai, yo Yaubada yana walo hiwalowalo mahalava mayadi atepatu.

¹⁵ Tupwadi tauguguyao alomagigiliyena higuguguguya Besinana vehabana, na tupwadi neta nuwatuwu namwanamwa ainaena higuguguguya,¹⁶ ta hiya hivelauwegau yo hihanapuigau neta vada paipaiyai yamiyamiya wasa namwanamwana ana ve'ita vehabana,¹⁷ Na hesi tau'alomagigiliwone nuwanuwadi ta hil'abiye nuwavitaiyegau hauga teina vada paipaiyai yamiyamiya, eeta oyamaena Besinana wasana higuguguguya ei hibom yadi boda vehabana.¹⁸ Besiwa, na Besinana wasana ana guguya mwala'ina vehabana yayaliyaliyaya, nuwana oyamaena bo walomoihrena.¹⁹ Yo hinage yayaliyaya, wuwuna yahanahananpui neta Yeisu Besinana Alu'aluwana yana hagu ainaena, yo yami awanoi aidiyena, ebe hilivahigau teina miya vitai ainaena.

²⁰ Hinage mayagu nuwatuwuhae ta nuwanuwagu mwala'ina ebeha havena yahinihinimaya, na hesi mayagu atepatu teina ta'i ta hauga maudoina Besinana yehana ya'abil'abiye mwala'i, nuwana yagu miya bale'uwai mayawahigu, bo nuwana yagu mwalowoi ainaena.

²¹ Moiha ta'i, yagu miya bale'uwai neta Besinana baidagu, na hesi yagu mwalowoi ainai lauhepoi Besinana ainaena mata yalobai.²² Ebe bale'uwai yamiyamiya yagu paihowao namwanamwadi Besinana vehabana himahamahalava, eeta nigele yahananpui hava mata nuwanuwagu yavesinuwaene.²³ Na ginauli bwau aidiyena adi vesinuwa aliguwai hivitai alili. Nuwanuwagu yo bale'u teina yalaugabaei ta Besinana baidagu amiyamiya, neta abayaliyaya mwala'ina.²⁴ Na hesi ilowoinanegau ta bale'uwai yamiyamiya yo ebe yahaguaguigomiu.

²⁵ Eena yahanapui moiha mata omiu baidaguwaen tomowa Besinana yahaguigomiu ta amyaliyaya yami yemidi Besinana ainai vehabana,²⁶ yo hinage yagu laugwapilewa alimiysi vehabana amyaliyaya mwala'ina, wuwuna Yeisu Besinana yana hagu alidai.

²⁷ Am'ita avivinigomiu ebeha yami paihowaena tomowa Besinana wasana hi'awa namwanamawaei, eeta yatau bo'eyegomiu, bo nuwana ebe yamiyauyo, bida ta'i wasamiu namwanamwana yabenabenalei ebeha mayami atetalam amtowotowolo wahiyala, na yami nuwatuwu ehebo ta am'ai'aipate wasa namwanamwana ana yemidi vehabana.²⁸ Havena hinage ammehemeheuhi ami alehao aidiyai. Teina wuwuna hibom hihanapui moiha ebe hisilahe, omiu mata livahi amlobai Yaubada ainaena.

²⁹ Wuwuna Yaubada bida italam'o alimiysi ta Besinana ainai amyemiyemidi ta ibom hinage vehabana muyao mata amlobaidi.³⁰ Dova

yagu lo'aleha Besinana vehabana yo agu muyao am'itadi'o, na teina hauga ambenabenaledi, ta omiu hinage yami lo'aleha yo ami muyao dova amlobalobaidi.

Nuwadobi

2 ¹Howahowana Besinana i'abiye atepatugita, bo yana velauwena ta'a'i'aipate? Howahowana Alu'aluwa Ve'ahihi ive'au'augeluwegita, yo ainaena tavelau namwanamwaegita yo ta'atemuyamuyaoyoigita?

²Ebe dova, amvenuwatoyawa na amvelau namwanamwaegomiu, alu'aluwamiyena yo atemiyena amve'ehebo ta ebe yami velau namwanamwana teina vehabana yayaliyaya moiha. ³Havena am'ai'aiduma yo amnuwahaehae, na hesi amnuwadobi, yo ami geluwo yehadi am'abihinidi. ⁴Havena ambom yami paihowa vehabana amnuwanuwatuwu na hesi ami geluwo yadi miya namwanamwa vehabana amnuwanuwatuwu.

⁵Howahowana ebe yami nuwatuwuwo Yeisu Besinana yana nuwatuwu dova. ⁶Iya Yaubada, na hesi nigele nuwanuwana ta yana vetauloina i'abi avivini, ⁷aenaena Yaubada yana wasawasa ilaugabaei, na hilabahi bale'uwai, ta ivetaupaihowa ana oleya tomowa ita dova. ⁸Hinage yana nuwadobi ainaena, ibom italamyowei ta imwalowoi aiwa lagalagana ainai.

⁹Teina vehabana Yaubada Yeisu i'abihini na yehanane i'abihiniuyoi yeha maudoidi ewadiyai, ¹⁰eeta yehanane taumiya galewa yo taumiya bale'u na taumiya bwebweso hinage, maudoida tapwagogo ainai, ¹¹yo ta'awa moiha ebeha Yeisu Besinana ibom yada Bada, neta Tamada Yaubada tano'owei.

Masele taumiya bale'u vehabadi

¹²Augeluwo, mwalona am'awa abi moiha na teina ta'i alimiyyena yamiya amwaha daodao'o, na besiwa howola am'awa'awa abi ili'ilimani, ta mayami meheuhi na mayami atehawawali ampaipaihowa ta ebe livahi namwanamwana ainai ammiya ili'ilimani. ¹³Yaubada iya atemiyai ipaipaihowa, ta ibom yana nuwatuwuwenen amnuwanuwatuwu na ampaipaihowa.

¹⁴Yami paihowa aidiyai amtalam ampaipaihowa, na havena amta'wata'wata yo nuwana am'ulu'ulumiyyai, ¹⁵ta ainaena omiu Yaubada natunao namwanamwamiu yo masemaselemiu, eeta nigele teya yami yababa, na hesi taumiya bale'u yadi masele omiu, wuwuna hibom mumugadi guguyouna yo yababana.

¹⁶Augeluwo, wasa namwanamwana am'abi avivini ta ainaena yawahivatayai amlobai, na haugana Besinana ilau gwaipilema yayaliyaya, wuwuna nigele nuwagu yagu paihowao alimiyyai yagabaedi.

¹⁷Ebe agu alehao hi'oiye mwalowoigau, neta dova hipwaoliyegau yami yemidi vehabana, ta mata omiu baidaguwao tayaliyaya. ¹⁸Ta ebe howahowana na omiu baidaguwo tayaliyaya toyawa.

¹⁹Yanuwatuwuhae ebeha yada Bada Yeisu yana haguwena mata hauga iu'iuna ainai Timoti yavetamalaenawa ta wasamiu ivaiyama, eeta yabenalei na ebe yayaliyaya. ²⁰Timoti ibom agu tauhagune, na nigele teya yaiya iyamiyamiya ta ebe vehabamiu inuwatuwu ili'ilimani. ²¹Na agu tau'abihaguwo bagibagilidi hibom vehabadi hinuwanuwatuwu, na nigele Yeisu Besinana yana paihowa vehabana hiyanuwanuwatuwu.

²²Timoti amhanapui'a'o neta towaho namwanamwana, ta iya dova natugu baidagu wasa namwanamwana vehabana a'ai'aipate.

²³Eeta haugana ebe agu loina yabenalei, nuwanuwagu na Timoti yavetamalenawa alimiayi. ²⁴Na yayemidi mata yada Bada yana hagu yalobai ta hauga iu'iuna ta'i na yau hinage yalaowa alimiayi.

²⁵Teina hauga nuwanuwagu Epapilodaito yavetamalenawa ilau gwaipilewa alimiayi, ibom tahigu baidagu apaipaihowa, bada dova a'ale'aleha Yeisu Besinana vehabana. Epapilodaito mugai agu hagu alimiyenya ivaiyama'o, ²⁶na teina ta'i iya nuwanuwana omiu, ta haugana yana lovala wasana ilaowa ta ambenalena'o, inuwavitai moiha wuwuna omiu am'ate'atehlerawali yana lovala vehabana. ²⁷Bada ilovala'o mwala'ina, na hesi Yaubada i'atemuyamuyaei, yo hinage yau i'atemuyamuyaegau wuwuna mata dova ta Epapilodaito imwalowoi na ainaena yanuwavitai moiha. ²⁸Ainaena nuwanuwagu mwala'ina yavetamalenawa na am'ita tuyoi mayana namwanamwa ta ebe amyaliyaya, eeta yagu nuwayababa i'ovi. ²⁹Haugana imahalavawa yada Bada yehanaena amyogaei yami vadai mayami yaliyaya. Yo hinage tupwadi yada Bada yana taupaihowao, ebe hilaowa alimiayi dova amve'ahiiyedi. ³⁰Moiha Epapilodaito muhamuhana na Besinana yana paihowa ainaena imwalowoi, wuwuna omiu nigele howahowamu yo amhaguigau, eeta iya italam ta ihahaguigaune neta vehabana ilolovalane.

Mumuga namwanamwa vehabana

3 ¹Tahiguwao, yada Bada vehabana amyaliyaya. Mwalona nuwatuwu teina yaleleyawa'o, na teina hinage nuwanuwagu ebeha yaleleyuoi, yami miya namwanamwa vehabana. ²Am'ita avivinigomiu tauyababao yadi mumuga dova edewa, hibom hapi 'wapidiyai ana tauvai bodadi aidiyena. ³Na hesi ita ada hapi atedai, ta Yaubada ainai tapwagopwagogo Al'u'aluwana ainaena, eeta Yeisu Besinana ibom tawalowalo vetuvehaeyei, na nigele ginauli bale'u ainai tayayemiyemidi, neta ainaena ita hapi moiha bada tavaiya'o. ⁴Yau bale'u mumugana aidiyena yanuwahaehae, wuwuna yau hinage tomowa tupwadi yamwala'i gabaedi. ⁵Yau ta'i Isileli towahona moiha, na yagu huhu Beniyamina, ta agu ulutubu Hibulu na

'wapiguwai hihapigau yagu tubui ana ahubena 8 ainai, ta taupwaoliwo yadi loinao yamulita ili'ilimanidi dova Palisi yadi boda. ⁶Na tapwalolo ainaena ya'ai'aipate mwala'ina Yaubada yana bodoa adi abiymuya vehabana, na loina ainai nigele teya Mosese yana laugagayo yayaho'e. ⁷Na hesi teina mumugaone bada ya'awa ginauli awa'awawaedi'o, wuwuna Besinana ibom ainai yatalamwegau'o. ⁸Moiha, yagu Bada Yeisu Besinana ana hanapu iya ginauli mwala'i alilina, na ginauli bale'uwai imwala'i gabaedi, eeta mumugawone teina nigele nuwagu, ta Yeisu ibom vehabana ginauli maudoina yamwauehuludi yo ya'awa yababaedi wuwuna nuwanuwagu Besinana ta'i. ⁹Yo hinage nuwanuwagu Besinana ainai yamiyamiya nigele ebeha yabom yagu mumuga dumwaluwena bo Mosesse yana loinao aidiyena, na hesi yagu yemidi Besinana ainai vehabana. Neta mumuga dumwaluna Yaubada ainaena na imohemohegita yada yemidi Besinana ainai vehabana. ¹⁰Nuwanuwagu hinage Besinana yahanapui yo yana towolouyo ana wahiyala yalautowoi, ta ana muyao baidagu ave'ava'avalaeedi, na hinage yana mwalowoi yave'ao'aonaei, ¹¹ta ainaena ebe mwalowoiyena yau hinage yatowolouyo.

¹²Nigele ebeha towolouyo bada yalobaiya'o, bo nuwana yagu mumugao maudoidi hinamwanamwa'o na hesi teina ebeha ya'abi avivini. Ginauli teina vehabana Yeisu Besinana bada i'abi avivinigau'o. ¹³Tahiguwao, nigele yayawalowalo ebeha bada ya'abi aviviniya'o, na hesi yagu nuwatuwu ehebo ta'i, ainaina ginauli dagelaguwai yanuwagabaedi'o ta hava mehegwai vehabadi ya'ai'aipate wahiyala, ¹⁴neta abamasiwa, Yaubada yana yoga haehaena ana maiha galewai Yeisu Besinana ainaena.

¹⁵Eeta maudoida teina dova tanuwatuwu toyatoyawa ebe yada nuwatuwu bada hihuna'o. Na ebe yami nuwatuwu vagadi, ginauli teina vehabadi howola abo Yaubada ive'itaedi alimiayi. ¹⁶Na hava talobalobaidi ebeha ta'abi avivini ili'ilimanidi.

¹⁷Tahiguwao, maudoiimu amve'ao'aonaegau, na ebe yaiyadiwo yadi mumuga dova yau, amvinuvinunuidi ta omiu amvemumuga dova. ¹⁸Na hesi tomowa bagibagilidi yadi mumuga ainaena Besinana yana mwalowoi aiwa lagalagana ainai hive'alehaei. Hiya mwalona yawalo mahalavaedi'o alimiayi, na teina hauga hinage mayagu dou yawawalouyo tauyababaone vehabadi. ¹⁹Hibom yadi aba'ovi ainai mata hisilahe, wuwuna yadi abayemidi diyadi ibom vehabana, yo ginauliwo abahinimaya hiwalowalo vetevehaeyed, wuwuna ginauli bale'u ta'i nuwanuwadi. ²⁰Na ita hesi yada dalava galewai, ta ainaena ada Taulivahi, ibom yada Bada Yeisu Besinana, howola abo iwuyoma, eeta vehabana taha'waha'wa. ²¹Na haugana iwuyoma, mata tauda tapitapiyadi imwau gwaipiledi, ta tauda wahiwahiyaladi yo masemaseledi dova ibom taunane. Yana paihowa teina ibom yana wahiyalaena, wuwuna howahowana yo ginauli maudoidi aidiyai ivetauloina.

4 ¹Tauhiguwao, yagu velau alimiyai wuwuna omiu yagu abayaliyaya yo yagu abano'o, eeta yagu nuwatuwu mwala'ina ebe ya'itauyoigomiu. Amtowolo wahiyala yada Bada ainai.

Guguya

²Omiu waiwaihiu, Yuwodiya na Sinitiki ya'awanoi alimiyai ebeha amve'awa au'augeluyo, yada Bada yana nuwatuwu teina dova. ³Hinage owa augelu moiha, ya'awanoi ta waiwaihiu teina uhaguidi, wuwuna mwalona hibom baidaguwao apaipaihowa toyawa wasa namwanamwana ana walomahalava vehabana, yo hinage Kalemeniti na tupwadi agu tauhaguwo baidamaiyao apaipaihowa, hiya yehadi yawahibukina holanai leleleledi.

⁴Hauga maudoina amyaliyaliyaya yada Bada vehabana, na yawalouyo ebeha amyaliyaya ta'i. ⁵Howahowana yo tomowa maudoidi yami alama'i'ita hihanahananapui, wuwuna mata yada Bada iwuyouyoma.

⁶Havena teya hava vehabana am'ate'atehawawali, na hesi am'awa yauwedo ginauli maudoidi vehabadi Yaubada ainai, na ampwagopwagogo, ta yami nuwatuwuwo vehabadi am'awa'awanoi. ⁷Ta Yaubada yana nuwadaumwali ainaena i'abiye yaliyayagomiu. Na yana nuwadaumwali nigele howahowana tanuwamaseleyei eeta ainaena Yesu Besinana baidamiu atemiu yo yami nuwatuwu himiya namwanamwa.

⁸Tahiguwao, teina yagu walo ana higa, neta ginauli moihami vehabadi amnuwanuwatuwu: Ginali namwanamwadi, yo dumwadumwaludi, yo masemaseledi, yo adi oleya namwanamwadi, yo venuwavaivaidi, ta hava ebe namwanamwa aidiyai, vehabadi amwalo vetuvehai. ⁹Omiu amve'ao'onaegau, yagu pahowaone am'i'itadine aidiyena, yo yagu walowone aidiyena na yagu ve'itaone ambebena ledine ta amhanapuidi'o. Ainaena Yaubada mayana nuwadaumwali baidamiu ammiyamiya.

Taumiya Pilipai yadi velau Paulo ainai

¹⁰Yada Bada iveauyayagau'o wuwuna teina hauga am'atemuyamuyaegau'o. Mwalona nuwanuwamiu amhaguigau, na hesi nigele teya amwaha. ¹¹Ta havena ya'ulu'ulumi yagu miya vitai mwalona vehabana, wuwuna bida yahanapuiya'o ta howahowagu yagu miyamiya maudoina aidiyai yayaliyaliyaya ta'i: ¹²Hauga miyavitai bo yaliyaya; hauga mahuli bo vahali; hauga vewasawasa bo vewewelohe. ¹³Howahowagu miya maudoidi aidiyai ebeha yayaliyaya, wuwuna Besinana ibom baidagu ta ainaena i'abi'abiye wahiyalagau. ¹⁴Na yagu miyavitai teina bida am'abiye malamalaiya'o yami haguweni, ta vehabana ya'awa yauwedo mwala'ina alimiyai. ¹⁵Omiu taumiya Pilipai amhanapuiya'o wasa namwanamwana ana walomahalavao mugai

alimiyai, na haugana Masedoniya yalaugabaei, nigele teya Yaubada yana bodaob tobwatobwa yo ai'ai ainaena hiyahaguiguigau, na omiu hesi taumiya Pilipai ambom amhahaguigaune. ¹⁶Hauga mugai Tesalonaika ainai yamiyamiya amhaguiguigau'o na mulitai hinage amhahaguyoigaune.

¹⁷Yagu walo teina nigele ebeha nuwanuwagu aiyauya awawa ammohemohegau, na hesi ebeha yami aiyauya ainona alimiyai imwala'i ami hagu moiha vehabana. ¹⁸Na yami velauwa Epapilodaito ivavaiyamawa maudoina yalobaiya'o ta imwala'i alili bada dova yami pwaoliwo Yaubada ainai amgabudi'o ta panena namwanamwana ibenaledi'o ta vehabana iyaliyaya.

¹⁹Eeta yagu Yaubada yami venuwao maudoidi imohemohegomiu, neta ibom yana wasawasa ibagibagili alili Yeisu Besinana yana paihowa aidiyena. ²⁰Ainaena Tamada Yaubada tano'owei ta nigele yana aba'ovi. Moiha.

²¹Yagu awayauwedo Yeisu Besinana yana Yaubada yana bodaone maudoidi aidiyai, yo tahiguwone teinai baidaguwao amiyamiyane hinage yadi awayauwedo alimiyai, ²²yo Yaubada yana bodaone Sisa yana vadai hipapaihowane, yo hinage Yaubada yana bodaob maudoidi yadi awayauwedo alimiyai.

²³Yada Bada Yeisu Besinana yana ve'i'ilaea alu'aluwamu himiya namwanamwa.